

太保費文憲公摘稿

太保費文憲公摘稿卷之十八

誌類

皇明封太安人舒母聶氏墓誌銘

嘉靖四年二月二十日舒母太安人聶氏卒于其子
修撰芬之官舍修撰君奉柩南歸將以某年某月某
日附塋於新建石麓山其考贈修撰野江先生之墓
自具事狀來請予為銘比歲修撰君既荷貤封屢乞
歸養而不可得去年冬十一月太安人乃就養至京
於是計纔百日而何為遽有此邪太安人聰明識道
理無所蔽惑自幼通孝經小學等書日用動靜取為

證據於人之邪正鑒別無失遇事吉凶能豫度其然
已而果然其教修撰君嚴每課讀常至雞鳴懼其勞
傷又常取藥餌之有資於心肺者助之修撰君既舉
于鄉會試屢不第則諭之安命惟欲以名節自勵及
修撰君狀元及第又以不朽諭之武宗南巡修撰
君抗疏諫止被箠幾殆遂謫閩中船官而太安人未
嘗沮喪憂懼蓋其賢可擬於柳仲郢范滂之母也於
銘奚媿哉按狀聶為南昌鉅族太安人之父服膺性
豪尚義能詩詞多交名人母鄭柔順恭謹生四子三
女而太安人最幼故諱末年十九歸野江能以孝敬

相之中饋烹飪皆中度表親有識者以為自太安人
入舒氏門酒茗醬醯皆一變盛之北也時祭俎豆必
致其誠賓客過從不待野江之命而佳設已具事姑
樊孺人久而益篤樊老感竒疾伏枕十月衣被垢穢
必親澣濯不以委人遭舅姑之喪哭必哀盡於時二
兄公俱室遊在外殯殮之具贊野江惟厚之從與其
妯娒處睦而無累視二姪如其子然御僮僕莊而能
慈徃徃有既去而懷戀其復來者歲凶鄰媪之老羸
至必飯之曰吾力雖不能周而於此見吾之意野江
性剛嫉惡喜面折人鄉人及弟姪有過者或望而避

太安人每婉言勸諭欲其有容蓋其為妻為婦之賢
又如此太安人生景泰五年三月三十日享年七十
有二男止修撰君一人女二人長適臨川何珍先卒
次適豐城李漸由進士今為南京吏部驗封司主事
孫男二人長泰次奉女三人長適同縣徐口敬次適
府學生樊夔其一尚幼曾孫男一人在襁褓銘曰惟
郢有母其學乃成惟滂有母乃以忠名學為倫魁忠
紀主怒人曰賢哉此子此母養未五鼎子心悲傷
名丁百世母志以償石麓之銘德則多有餘慶攸鍾

明故封淑人張母段氏墓誌銘

淑人姓段氏出汲冢族爲通守諱某之孫隱君子諱
繼宗之子歸同邑張氏爲御史健齋府君之婦致仕
江叅政衛濱公之妻故太常少卿衍瑞今翰林修撰
衍慶之母也其資稟聰慧閑於姆訓有柔婉和平之
德在室黼姆劉氏曰吾必不爲凡子妻年十七以歸
衛濱公時御史府君已棄養公追念遺命銳志欲續
聞成宗而身爲家督弗得專於學也米鹽煩瑣皆屬
之淑人租荼拮据不以勞憚公乃日事探討工文詞
卒成進士公嘗曰微吾妻吾烏能紓內顧以成吾志

邪淑人痛御史府君弗逮盥饋時祀俎豆必豐潔如
禮事姑周太孺人動求意愜有疾則左右侍湯藥必
手出自旦達暮弗忍離其卒也哭之哀甚公二弟仲
述早世慰其嫠懇悃周至卒使堅守無他季維亦早
世撫其孤女二使各有歸厚其資裝而遣之人歎公
篤于孝友而不知由淑人之克相也淑人平生儉素
從公蔭宦幾三十年縷布粒粟未嘗妄費然於姻鄰
之糴獨者見輒憐之隨所有賙之恐後愛奉常翰撰
甚切然未第督之詩書仕勵之忠義蓋拳拳焉故先
後取甲科官禁近能以文學節槩紹公之業其初封

孺人也以公爲評事之最再封宜人也以奉常爲吏部主事之最加封淑人也以翰撰爲檢討之最可謂榮矣淑人生以景泰癸酉八月廿九日卒以嘉靖乙酉三月一日享年七十有三子男三長即奉常以諫止武宗南巡由文選郎中左遷府佐今上嗣極召還進秩而卒復贈太僕卿以旌其忠次即翰撰學醇而行篤蓋錢遠之器也次衍祚方以太學生需次銓曹女一適里人鄒儒先卒孫男九楮棐早卒次模檢棟槩樸女五長適鄉進士陳留高像餘尚幼曾孫男女各一大叅公將以卒之年月日葬淑人於城西

新阡黃山之麓翰撰既得請守制乃具事狀哀經躋
予門求爲銘予於翰撰有斯文之雅予弟宋又同年
世誼也誼不可辭遂爲敘而銘之銘曰夫有令妻其
學乃專子有賢母其業乃傳於家允宜於身慎淑封
如其德膺此多福福有餘留在其孫曾德可長垂不
腐以形惟仲之貶其來未已最德埋辭以慰其志
故贈承德郎刑部廣西司主事楊公墓誌銘
友松楊公卒于正德丙子八月二十三日其葬禮未
備子瀕有遺恨焉嘉靖甲申乃自刑部乞歸將卜吉
改窆而持葉太史叔晦之狀來請銘公諱崑字振瑚

松其別號也世居貴溪之羅塘曾大父文操大父
禮安父字彰母倪氏由公而上皆以隱德稱及公始
知問學通書史其性警敏可以宦業顯也而妨於家
務弗克就及濂少長亟取舊所蓄編簡教之訓戒嚴
甚擇明師爲之模範猶日課所業不少懈濂領弘治
甲子薦其卒業於南雍也自載薪米汎重湖大江往
給之雖觸冒風濤之險無所顧累諭濂必取甲第勿
安於小就以爲此賢俊正途國朝所重也濂果登正
德辛未進士出令南安公即養又朝夕以愛民勤政
最之歲癸酉大侵濂給賑少緩公曰轍耐不救將索

之於拈魚之肆矣緩可乎濂受命即發倉實予民其所全活者不可勝數濂竟以愛惠起譽得召用爲西曹郎吏今天子嗣極以恭上三宮尊號推恩臣庶乃贈公刑部廣西清吏司主事階承德郎公雖不及顯用而其教子之志於是乎亦已酬矣公內剛外和孝於父母處二兄一弟以友愛聞平心率物爲鄉人所推服有爭辯不能決者咸取質焉家不甚饒而守分執義未嘗妄取然性好施予窮乏有所求輒隨力應之故基甚隘濂以已貲充拓諸昆弟無預也公與之均分而處會術者謂左吉視右爲優復虛右聯居

於左其爲人仁厚多此類然則子之有成詎非爲事
之報耶公生天順庚辰春秋僅五十有七配章氏封
太安人子男三長湏次郎濂也今爲刑部員外郎次
洛孫男七曰會曰南曰縣曰僅曰佛曰新安曰瀛海
女五錦玉仙玉帶玉安玉四玉墓在里之龍泉山其
塋以嘉靖乙酉九月二十二日戊寅皆壬酉丙從吉
兆也銘曰彼松之材可梁可棟我其友之志爲世用
志爲世用豈必其身我用未究在我後人善繼善述
有子則孝儒和吏邪惟公善教秋卿之旅折獄惟良
贈命伊始公澤甚長壽也匪緩慎於卜吉昭美有辭

歲之幽室

明故資德大夫正治上卿南京工部尚書贈太子少保叢公墓誌銘

南京工部尚書叢公既捐館舍 上聞訃震悼贈太子少保賜二祭命有司為營葬事先是公配邢夫人之葬已築壙於某山之原其子縣學生磐以嘉靖甲申九月二十一日遵禮制啓而合焉持御史藍君王甫狀以公治命來徵予銘公之成進士也予實監學文衡後以宦寓相隣數往來講評數學契誼益厚公今已矣思公而不可見矣銘其忍辭公諱蘭字廷香

別號半山世爲登州文登縣人祖諱實榮父諱春俱以公貴累贈資政大夫都察院右都御史祖妣馬氏孫氏妣劉氏俱累贈夫人公生而穎異弱不好弄惟耽玩經籍甚於嗜炙海濱無市本往往手自抄錄夜誦達旦以成化癸卯領鄉薦再試禮部不利自都下鬻書輿歸益加探討自天官三式兵鈴醫術筭數之類靡不究心弘治庚戌登進士第明年除戶科給事中巡光祿寺見有司飾皇壇供器䟽崇尚異教爲先朝遺弊當亟罷尋以外艱歸八年終喪復職巡房山諸草場蒞內庫出納多所釐正時災異疊見公言

消復當實行今日之務在惜人才慎舉措恤畿民撫
邊戎警急玩杜貪殘元惡如中官汪直輩之陰圖復
用奸貪如侍郎林鳳輩之未見罷黜左道如太常卿
崔志端之紊亂舊章皆宜懲處以順上天遏惡之命
尋陞兵科右給事中內降以署都指揮吳安爲都督
及邊將姚信以失機獲宥皆極論之大閱京營與司
馬公同心協議務祛宿蠹蓋在科十餘年遇事必言
言必盡中官何文昂以直言得罪又嘗合臺諫救之
至於忤旨下獄而其志未嘗少挫焉十四年陞通政
使司右叅議會以災異求言公又偕同官疏時事列

上又明年轉左叅議適北邊有警經畧紫荆等關塞
蹊隧可通胡騎者數百處復於浮圖峪夾岸剗起敵
樓增戍兵易將領諸所籌慮皆百年固守計邊人預
之十八年以內艱歸後三年終喪還朝蓋正德戊辰
歲也其秋陞右通政庚午之春逆瑾請遣官規畫邊
務兼督糧儲清屯地抽選軍丁而公滑延綏至則寧
夏之變作矣延綏人竊議洶洶公入境鎮之以靜衆
乃少安時方覈邊功賞不時下文武官以罰米賠糧
繫獄久不克完其謫戍除名沒產者多出鍛鍊考察
之令一歲至再三舉行邊民以催徵逋負逼迫逃竄

將家由武舉進者分隸各鎮類愁寂不能聊生傾事
之卒紛紜出所過莫不危懼公以為此數事皆人
心所甚不便宜速改而不容緩者疏至則詔已悉行
之瑾銜其拂已欲中以禍公處之如平時數月瑾誅
陞通政使自未浹以三邊告乏陞戶部右侍郎兼都
察院左僉都御史奉勅總督寧夏等處糧儲值歲旱
禱于群望鞠冤繫釋之三邊皆雨先是關中鹽引利
皆歸于權右及公來無敢私謁商通而事乃濟諸有
補於邊儲者皆一一條上行之是年夏又奉勅兼管
固清等處軍務聞山東河南群盜猖獗念內地齊民

猝遇兵變必不勝供億之苦亟疏于朝請別處軍餉以紓民急會廷議亦念中都地重兵荒相仍亟召公巡撫廬鳳滁和并以賑濟委之七年春公至鳳陽賊已壓境公督率吏士防遏綠河諸渡口警報至即躬擐甲冒身先士卒奔走邀擊俘斬二千餘人溺而死
者數萬賑濟所全活者又十二萬六千八百餘口撫
釋脅從男婦幾六百人事聞賜勅獎勵賁以金帛秋
九月師還老稚攀留滿車下為立生祠還朝論功又
陞俸一級廕一子為太學諸生加賜金帛羊酒宴于
禮部八年又以虜警奉敕巡視西路諸關兼督宣大

軍餉九年春陞右都御史總制宣大并山西偏頭寧武鴈門等關軍務再辭不允乃行至邊相地設險令內地居民各築堡入保亦如塞下賊嘗一再深入公自駐陽和以當其衝分部諸將十七人伏兵要害遣謀者往來傳報或掎或角賊乃遁我兵又遽險邀之斬獲百有餘級虜酋傷右臂而馳捷聞復賜勅獎勵然坐與監軍不合其軍功竟爲所攘十年閏四月旬軍中還命總督漕運兼巡撫鳳陽諸郡寇剔宿弊改立條約著漕運錄行於時權右以私貸所債皆置不問則相與毀之遂罷督漕專理巡撫值歲飢民多流

穆公奏截漕粟數萬石益以倉儲賑之所全活者視昔加兩倍有奇水曹王主事鑿以抗直忤中貴史宣逮繫詔獄公疏宣不法鑿當亟釋中官劉允以迎佛使烏思藏所過誅求百計勢張甚公預檄有司毋徇所欲至淮謁入公辭焉遂疏斥佛老無益乞還允勿遣高墻庶人有逸而出者公乞并釋其無罪者以篤親親守備丘德以貪虐擾人公禁之德為少戢十四年逆濠變起公率兵禦之江擒偽謀百數武宗之南狩也至境上見公猶記公前任總制時過桑乾墮水事屢形顧問驛遞例有宴設多侈費求媚者公惟

金酒卮一事餘皆磁漆進獻物視他郡僅十一二逆
彬數有讒言竟亦無他十五年以六年考滿進階資
德大夫勲正治上卿其冬陞南京工部尚書聞報即
乞歸展掃已決退休之計矣明年上繼大統方任
耆舊公三疏請老不允公以濠平復陞俸一級嘉靖
元年屢疏上察其誠乃允休賜勅褒諭且有月廩
歲夫之給士論高之踰年而公不起矣蓋嘉靖癸未
二月二十六日也距所生景泰丙子十二月二十五
日享年六十有八配邢氏封夫人三子長即磐也次
磐次畧俱用廕入太學繼王氏一子曰磐女三其壻

爲太學生孫崇于璋寧海衛指揮王瀛孫男三棟府
學生次揖次模女四長許聘浦御史之子珠餘尚幼
公器度閎偉才識英敏所學期于經世而言論足以
發之自筮仕以來屢將使指經營四方未嘗以艱險
避威名在邊塞利澤在生民功業在國家可謂一代
之名卿才大夫矣而孝弟篤於家庭信義孚于交友
儉約廉慎終始不易又人所難及者於銘允宜銘曰
士類能言用則或違或優於易處乃弗宜克位苟祿
曷裨于時於半山翁挾負實竒才任應變事察其幾
錕鋔之劒視玉如泥太宛之驥籟雲而馳近之省闈

遠之邊陲惟所任使不計險夷民苦盜警我脫其危
民苦歲侵我恤其飢衆望攸屬

天子倚毘烈烈勲名弗愧常彛勒之幽宮爰永其垂
明故特進光祿大夫柱國太傅兼太子太傅新

寧伯謚莊僖譚公墓誌銘

嘉靖乙酉九月十二日太傅新寧伯譚公以疾卒於
家上聞訃震悼爲之不視朝一日命禮官諭祭者
十四其塋之費皆有司給之又賻以粟布若干石定
而其謚則莊僖也蓋所以卹其終者厚矣公子論卜
以某月某日奉公附於宛平縣石經山先塋之次前

持尚寶張君子材所為狀來請予銘予與公同朝
三十年誼素厚故不忍辭按狀公諱祐字允助別號
雲谿其先為滁州清流縣人曾大父淵由燕山右護
衛副千戶從太宗文皇帝即位論功定爵贈奉天
靖難推誠宣力武臣特進榮祿大夫柱國追封為崇
安侯謚壯節而命其子為新寧伯錫誥券子孫世襲
蓋公之太父也既卒公父璟嗣嘗奉命守浙卒于官
母張氏封太夫人公以順先年嗣爵時年甫十有
二態度凝重見者必慕逮到成化乙酉憲宗純皇
帝即位奉旨詣祭告皇陵并壽春等王丙戌死

使持節冊封慶韓伏三府己丑督馬政於南畿辛卯
用薦坐立威營兼掌府軍前衛事戊戌奉勅往南京
協同宗備兼掌右軍都督府事己亥召還充總兵官
提督神機營掌前軍都督府事辛丑加太子太保以
北虜有警命練團營士馬待報而行丙午加太保兼
太子太傅丁未 實廟冊諸妃冠皇子命大臣為正
使公與焉弘治己酉命提督十二團營仍兼督神機
營是年蘆溝河漲壞隄統軍夫二萬人興工修築其
勞勩具于御製之碑丙辰改掌中軍都督府事兼提
督九門鎖鑰戊午加太傅仍兼太子太傅以所加秩

貽封三代念大父戰歿乞建祠墓所 孝宗可之賜
祠額如其所謚諭有司以春秋薦事庚申以陞馬辭
團營專督神機癸亥改掌右軍都督府事己丑陞
泰陵興董其役歲丙寅 武宗改元正德命侍經筵
丁卯以演武廳歲久傾頽奏請修葺己巳改提五軍
營加特進光祿大夫柱國辛未命暫督三千營甲戌
復提督十二團營兼五軍營掌後軍都督府事乙亥
以建乾清坤寧二宮督軍營作日給酒饌具䟽言臣
叨厚祿方懼無以為報請勿給以少節太官之費丁
丑 孝貞皇太后合葬 茂陵復董其役己卯以提

病累辭營府之務詔不允及上登大寶復懇辭詔
若曰卿勲舊重臣諳練戎務朕於新政之初方倚重
焉而乃以疾辭懇懇若是其何忍違於是得疾養病
蓋三年而始痊距其生正統丙寅某月某日享年八
十配柳氏永傳安遠侯溥之女封夫人側室吳氏黃
氏子男二長勲衛綸應嗣爲伯黃出也次前任錦衣
都指揮使綱吳出也女三長適魏國公徐璧奎次適
伏羌伯毛江次適陽武侯長子薛藩孫女一尚幼公
天資淳厚襟宇和粹臨下有威望之嚴然平居寡然
於人廷辭議中言論亦不敢發而胸中確有定見

論多之值時承平無征戰之功而遠識雅量安閑鎮
靜足以增邦家之重其督營務治軍旅號令明肅至
於廉靜寡慾人尤難及雖居穹爵享濃祿家無聲色
之奉父喪時甫三歲賴母太夫人撫教有成嗣封之
後備極孝敬動求意愜教諸子慈而嚴待宗族咸有
恩誼叔父瑛待公甚薄瑛歿公撫其子女孤孫爲之
婚嫁蓋無異瑛之猶生也若公者可謂一代之老成
矣銘曰譚氏之顯昉于壯節捐軀夾河其氣烈烈內
難既平追贈五列帶礪之盟百世勿絕三傳至公遭
世承平由保而傳其階屢升念我始封弗祠于塋俎

夏以時副我孝誠公督諸營迭蒞五府夙夜在公爲
國講武緩帶雅歌折衝尊俎鳴劒抵掌匪公所慕高
都濃饗循矩履繩平居簡淡宛然儒生耳目之奉匪
色匪聲世祿侈縱蓋公所懲年登大耋亦既壽只歸
于九京可無恨矣 帝有卹恩賜塋與祭華衮之榮
易名有謚石經之麓惟舊有阡若焉之鬣新封巋然
我最其德樂石是鐫埋之幽宮用永其傳

夏母匡太宜人墓誌銘

太宜人匡氏爲吾鉛人歸貴溪夏氏爲臨清字象峯
公諱鼎之配嘉靖元年以其子兵科給事中言貴封

如夫階頃卒于給事中之官舍給事君將奉柩歸伏
其行以塋銘予屬予交君父子餘四十年君之子敬
承爲予弟完之塔予弟崇之子懋樂又皆女弟之夫
也於是有世好焉銘奚容辭匡之先皆里居耕稼其
配傅氏能通書傳太宜人之母也太宜人生而端
重明秀與凡女異父母愛之爲慎擇所歸會象峯公
以從戎偕伯兒奉其母徐孺人亦寓京師而喪其初
偶吳知太宜人賢以繼室請年十七遂歸夏氏事姑
能順適其意與婦姒處雍睦無間言時公猶未第也
太宜人佐以勤苦執事無怠惰燈火恒及丙夜成化庚

予公領京闈鄉薦試禮部連不利則以授徒自給大
宜人時其飢渴爲治飲饌飫及諸生莫不益勸而忘
其講習之勞也弘治癸丑公游倦南還卜象山之側
而居焉賴太宜人爲理貲產不以憂衣食亂心得時
時溫習舊學丙辰竟以進士酬其夙志及出倅嚴郡
守臨清徃徃以廉能獲重語于當路雖公之持守卓
有定力亦以太宜人克相於內也公既歿太宜人懼
其遺緒或墜恒諄諄督勵其孤正德丁丑給事君復
登進士嘗以行人奉使過家拜慶太宜人歎曰汝父
承寵之榮吾固於汝乎望之乃今吾可以塞未亡人

之責矣庚辰給事君有諫垣選擢亟迎太宜人就養
至則首語給事君曰汝父素忠此官而弗得汝幸得
之惟赤心報國以成汝父之志是死猶未死也時給
事君方奉詔裁武弁冗員檢覈皇莊及諸勲戚所
兼并民產持法棘棘無毫髮私徇諸不便者謀中必
禍人皆危之太宜人不爲少動且諭給事君曰汝所
爲不負國家有裨新政禍福奚足計邪其言之依於
忠孝類如是太宜人封適壽六十賀者見其強健
以爲其年未艾越二年幼女訃聞慟甚忽感疾遂不
起蓋嘉靖二年五月廿日也距其生天順癸未閏七

月歲余得年六十有三子男二長即給事君次爲
國子生行女二長適同邑參政徐公浚之次子槩幼
即適予從子者也孫男二敬承克承女二淑清淑秀
其塋爲某年某月某日墓在某山之原太宜人性至
孝德與公協以恤貧賙急爲務而自奉儉薄食粗衣
敝不以爲嫌比受封給事君爲脩命服拜恩畢薦襲
惟謹給事君獻所得賜幣諸婦請製錦衾太宜人曰
君賜惡敢褻易簀時猶在篋中平居端默無大喜愠
尤以專制自遂爲耻有所行必公與給事君知終其
身不嘗私購一物是同愧於銘銘田牧天恩曰我特

寒素登桂籍吐膏潤守清白世其家有賢急備用
居諫職佩慈訓效忠赤施孔厚報終食晚膺封服
霞翟胡弗延子心惻藏幽宮磐樂石勒茲銘發潛德
昭靈燹示無極

明故資政大夫都察院右都御史張公墓誌銘
公諱綸字大經別號敬軒姓張氏其先鄱陽人也在
宋高宗時有爲寧國路總管者因家宣城於是爲宣
城人曾祖諱原甫鄉人稱留福處士以仲子皞貴封
武畧將軍富峪衛副千戶祖諱暉爲湖廣右叅政父
諱輔號逸菴俱以公貴贈資政大夫都察院右都御

史祖妣某氏母李氏俱贈夫人公少敏知學及冠師
閣老晦菴劉公學益還名公見其文異之成化癸卯
領順天鄉薦明年登進士第初知鹽山即明習吏事
首除民害數人取貴戚所侵田歸之業主設義倉以
備歲凶撫按官交章薦之弘治辛亥以風憲召且行
民遮送恨不能留壬子授浙江道監察御史監蘆溝
稅巡內庫巡光祿寺皆以嚴辦聞甲寅巡居庸諸關
邊備必飭武臣有縱恣者繩以法風采凜然尋以內
艱歸丁巳終喪改雲南道按真定諸郡賊吏望風歛
戢任縣令以非法殺人罪未正鞠實坐之富民被盜

王儼家燬煉獄成公察其冤脫論死者十三入於桎
借他平反又百十餘人平鄉令欲增淤田之稅且百
頃公曰河濱淤決不常可遺民他日患邪事遂寢會
清寧宮災陳時弊十事多見采納壬戌以久次陞光
祿寺少卿時藏用不足公疏浮費所當節者數事尚
膳中官素上供踰額詆侮僚屬又疏請司禮監懲之
嘗助獻內壇上顧問近臣是非張御史邪蓋孝
廟臨御既久方疇咨俊乂與共理天下事以公屢嘗
建白故屬意焉劉瑾舊嘗識公正德初擅政恨公踈
已欲中以禍賴李永正公力救始免尋擢通政司右

通政戊辰又擢都察院右僉都御史瑾熾日熾縉紳
多罹危中御史有枷項於通衢者公亟偕僚長救之
未幾擢大理卿奏讞輒忤瑾意時時與辯逢瑾怒不
爲少動致仕都御史張珍家爲仇所訐三子論斬坐
沒入江南民吳某沿俗競渡偵事者誣以爲私造龍
舟亦坐沒入皆賴公力辯得末減興襄三府訟田不
決者二十年矣公徃處帖然歸奏稱旨有牽膠寶楮
之賜歲辛未中貴錄囚欲脫豪右殺人者罪公不可
擬竟如初高陽民王豸爲奸僧所罔刺臂肉爲龍形
獲者欲坐叛侈功公謂法止梟首用是不合調工

部右侍郎癸酉改刑部侍郎尋轉左時偵卒多羅織
無罪公言於僚長務核實毋致枉人乙亥往覈代府
博野王兄弟互訐事會晉府慶成王獄久不決亦以
命公公訊鞫詳明奏當皆麗于法因疏處宗室選婚
又祿米折銀二事偵卒獲入京虜謀連引且至百人
會鞫欲盡坐公曰謀若是其多邪止罪二餘盡釋丁
丑以九年滿陞都察院右都御史時方奉命南行還
歷淮泗目擊水災慮民窮盜且延蔓乃以給賑蠲徭
諸事宜上請所司皆議行之山東民趙萬興假妖言
惑衆取美女以右稱有三儒生從之爲漁獵計也偵

事者獲之將以叛論公辨其非叛得不族蓋公留意
法律善察奸偽而斷獄平恕未嘗過求故自任臺憲
以至持天下之平於死囚多所開釋庶幾於民自不
冤及今止登極方窮治正德間諸惡黨繫臺獄者
數十人公乃數其罪狀以爲當誅而不可赦其嚴於
懲惡又如此然連及巨璫疏入月餘不報公疑焉焦
勞感疾乃懇乞退休疏八上始得俞旨有月廩歲隸
以寵其歸歸踰年忽構疾而逝蓋嘉靖癸未四月某
日也巡按御史以訃聞上惻然賜祭塋如制公享
年七十配邵氏累封夫人有子四長乾次幹皆領鄉

薦次韓以廕爲國子生次韓側室宋氏周氏生三子
曰幹曰翰曰輪孫男女各二人公內行甚篤自逸菴
歿後家益落授徒以供母養能裕其壘高祖塋桓山
久失守倍價贖之從兄綱老而無子以田贍之終身
從子鑑少孤以故居畀之其夫婦繼沒塋皆公治且
爲撫其諸孤各有室家又嘗修譜系置墓田爲收族
計甚悉治家嚴肅嘗語諸子當以謙持盈因書柳氏
家訓以警之性慈仁行道見齒路必蹇雖螻蟻弗忍
殘與人交不以存亡異情自筮仕以來所居官必盡
職求稱其在言路特論必存大體耻掇拾長短以自

爲名李文正公知公最深嘗謂公苦自樹立與世之
徇勢浮沉無所顧惜者不類平生所著有出巡錄憲
臺奏議棘臺駁稿三使錄晚效文正公爲詩渾厚清
婉有敬亭稿若干卷藏于家塋以卒之 年 月
自鑿在某山之原從新兆也乾幹持兵部左侍郎李
公處夫所爲狀徵予銘予素與公厚不容辭銘曰于
邑有惠于臺有聲躋于九列蔚爲名卿漢有張季守
法持平公其後邪休緒是承獄無大小必以其情惻
彼非辜弗得其生惟律之擬匪縱以輕一嬖不寬尚
厥闕如公仁人後有弗興水曰宛溪山曰敬亭歸

休于茲遂卜新塋卹終有典恩薦股肱勒銘幽宮以
求令名

明故封通議大夫順天府府尹萬公配淑人饒
氏合塋墓誌銘

公諱福字季崇姓萬氏世爲進賢折桂里人曾大父
俊卿大父德銓皆鄉長者父元和通詩經領永樂庚
子鄉薦終大理府儒學教授所至以善教聞累贈通
議大夫順天府府尹母牛氏累贈淑人公幼穎異日
記數千言童年與群士試輒首列成化辛卯薦于鄉
丁未登進士第以憲廟史事使蜀所修墓義積事核

時纂事主端毅公欲擇人分理鹺政以公副兩淮轉
運公懲宿弊獨不取分司鹽引餘銀嚴遇豪商庭見
外毋敢私謂諸場存積鹽歲久消耗竈戶貧不能償
爲因於撫按奏除之居七年弊絕課登屢膺旌薦弘
治丁巳陞南京刑部湖廣司員外郎尋轉山西司郎
中以平恕聽斷不尚刻核然無敢以勢奪者大司寇
戴恭簡公甚器重之乙丑陞知金華府事痛節侈費
大旱徒行雩禱既而大雨歲乃稔時逆瑾專政遣其
黨分偵郡縣有司覲免禍多賄之公曰賄出於民吾
忍剝民自利邪偵發者校尉樊信也恨弗賄也以

事報瑾族吏部罷公先是御史胡文壁以稽覈至和才公將特薦之而公以致仕歸矣及瑾敗信逮訊吐實公誣益白或勸公自辯可復出公以母老不能違養辭自是徜徉林壑者幾二十年子若孫踵接科甲顯于一時遂以京尹封人謂施厚必報天蓋久而後定也公性孝友痛其父及前母張淑人早背忌日哭必盡哀牛淑人晚嬰末疾坐卧食飲必躬親扶掖薦進處兄弟及其群從恩意甚勤與人交始終如一平生以恭儉自持既仕且老非賓會禮服無重帛食無魚味羣居恒徒步過鄉人必加禮敬世疎淡不留意

獨喜觀書諸子及孫既貴常寓書以忠孝勉之故其
仕於中外能卓然樹立爲名卿才大夫以畢公未究
之志嘉靖壬午之冬公爲牛淑人治墓過踐冒寒得
疾一日晨起沐浴索衣冠坐正寢呼家人與訣遂瞑
目而逝蓋十二月十有三日也距所生正統丁卯年
享年七十有六配饒氏封淑人亦邑著姓也父昌與
教授公相善因以淑人歸淑人歸公每夜讀必紡績
與俱賓友過從或脫簪珥供具未嘗怠勸其後從公
游宦輒扃鑰門戶防禁嚴甚薄於自奉欲以儉成公
之廉父晚盲歸寧見之輒涕泣不能自止其妻姑

子謙抑慈恕之德多與公合公既卒念之彌篤因用
病弗起蓋甲申正月二十三日生先公一年而其壽
多公三年子男五皆淑人出長鏐正德戊辰進士今
為嚴州府知府次欽早卒次銳習舉子業有成次鏐
領正德癸酉鄉薦亦先卒次鏐弘治乙丑進士今為
順天府府尹孫男七長津縣學生次潮正德辛未進
士為儀制主事時嘗以直言除名今為浙江提學僉
事次瀾次達生終生瑞生老生文二長適吳某次許
按察使傳習之男守忠曾孫男四大慶重慶衍慶多
慶女一許提學副使楊二和之男瀚初公訃至京京

尹以請詔賜祭命有司營葬事且并築淑人壙及淑人歿復賜祭如公皆異數也嚴州君昆季卜某年月日合葬於某山之原以予公同年進士命僉事君奉狀請銘予誼不得辭銘曰維積孔厚維施弗究人或厄公天卒公佑彼顯于身誰如公後維京有尹維郡有守亦有外臬皆可大受最公之積維孝維友維廉維恕官愼厥守人亦有言有子不死有德不朽媲美同歸矧有賢偶天光赫然賁茲異阜我銘幽宮昭示永久

月文
直大夫河間府同知張君墓誌銘

君諱珂字子文姓張氏居德興歲寒溪之東爲南京
工部尚書省菴公諱憲之長子其曾祖諱貴承祖諱
仲與俱以省菴貴贈順天府尹曾祖妣某氏祖妣某
氏贈皆淑人母余氏封如之君生而穎異省菴奇之
弱冠游邑庠試輒優等弘治癸亥以省菴三品最蔭
太學生明年甲子領順天薦屢試禮部不利正德丁
丑銓試上第授磁州知州磁故邯鄲地有恒代遺風
屬桴鼓方絕民生彫瘵前守稍繩以法俗頑獷不可
治君曰張急絲棼非治民之術也乃條其便不便白
於監司請無以文法束縛得以次行罷如民之欲監

司器之君於是從容展布不以掣肘爲慮旬歲令行
職修流逋聞之多自傍郡來歸君復其業貸其負租
良民故坐累代輸者乃皆脫免州當遠道迎送旁午
民有事訴于馬首君每爲按轡處分百姓稱張公馬
上按即疑獄剖以數語無不輸服其自悔頷解者聽
不強以法訟由是大簡初視學見其敝陋喟然歎曰
是可少緩邪即慮事冗工葺文廟講堂皆加于舊舊
所缺者如櫺星門鄉賢名宦二祠更剏爲之且授其
師以訓迪之規公暇輒即學課其勤惰自是磁諸生
自是歲已生于是河北冠乙民均躍洋洋

奔入荆郭君完而免之復浚其隍屹然金湯之固塗
帶郭舊有石梁嚙于漲君命工相水勢易其趺而廣
之兩涯復疊石為岸各長百尺漲不得衝既成行者
便焉辛巳夏 今上自郢入道磁君預消幄殿除馳
道比至大小諸司供張輿轎車馬之奉靡不周悉當
聖意蓋在磁多異政如蝗不入境雨不出疆二事人
尤以為奇居三年上官獎勞者六七吏部考最授奉
直大夫尋復任巡撫何公道亨巡按汪公景顏又交
章薦之乃給詔褒寵其妻室省菴公進階資政大夫
余淑人加贈夫人明年九月擢同知河間府事磁君

不忍去遽留不得乃請崔太史子鍾紀其遺愛君
素弱勤于職業不以勞辭既至瀛撫按聞其能數數
以劇務委之蒞事八閱月而行部於外者逾半歲王
事鞅掌不勝其困且念省庵公遷厝淺土歸興浩然
疏已具而疽發背遂卒知者惜其才用之未究云君
生於咸化辛卯某月某日其卒爲嘉靖癸未六月二
十七日享年五十有三初娶孫氏繼朱氏董氏汪氏
卒男三長文表側室馬氏出先卒次文博董出次文
迪汪出君弟琨娶于繼妹而子繼室以孫又與君連
袂給知君賢得言不惜之文迪奉君之歸將以

月 日 莖

請語之族兄國博君叔

成為狀來徵銘予乃序而銘之銘曰舒翹英兮韶
緒牧支郡方能愈著民樂生兮斂耳澍轅莫捉兮以
遷去勒遺愛兮寄石樹佐畿輔兮方軒翥命不延焉
誰齟齬埋茲銘兮永其譽

明故順元高先生墓誌銘

先生諱博字德宏姓高氏順元其號也始予偕計北
上遇先生於徐沛之間時暮初凍且解相與擊水而
進周旋月餘遂定交以而益驩每見必劇談治道於
民所養若龜物物洽之願死於數言而不試乎水

嘗不服其才之卓邁壯其氣之豪雄而悲其身之坎
壈也先生既卒且葬其子國華以予知先生不遠千
里持事狀來請予銘予方事明農筆硯塵積以先生
交誼素厚不忍辭先生上世爲汴人宋南渡徙華亭
居谷陽河橋之側大父諱珙父諱平號梅軒以贅於
楊爲編修珙之壻再徙東門遂家焉先生梅軒仲子
也幼端重慎默甫壯母楊病日侍湯藥不暫離聞呻
吟聲輒泣下不止梅軒公愛之曰亢吾宗者必此子
也長業儒博及經史多所自得游郡學文譽藹前儕
無不惟服郡博魯公瑛籍弟子學行必詣先生提

戴公珊婁公謙皆一代偉人也見先生待以魁士
成化癸卯遂領薦爲書魁之亞然八試禮闈輒不利
念梅軒公既老勉就乙榜授學正將之信陽途聞公
訃歸守制終喪改武岡取道拜毋江行遇風波有溺
者先生見而感之曰吾有垂白之親忍犯險遠遊以
重倚門之念耶耶飄然棄官而歸家居以清介自持
無所附麗惟日與定軒曹公一卷許公及鄉之諸縉
紳以賦詩飲酒爲樂優游桑梓幾二十年而終蓋嘉
靖丙戌二月二十三日也距其生正統戊辰十二月
十九日享年七十有九知先生者莫不哀之配王氏

禮部正郎臯之女弟也有內行子男三長即國華太學生次國容邑庠生次國賓女二其壻爲衛庠生王梁邑庠生周廷憲孫男六長節次士邑庠生次才次科次年次位女八曾孫男三承祥承裕承禧女一先生事父母處兄弟極其孝友閨門之內與王孺人相敬如賓性坦率喜延納情誼藹然而胸中權度精甚遇不當意者未嘗假借薄於自奉不徇俗爲封殖計然親交隣里有貧乏者必捐貲以周恤之或被誣惟於罪罟必極力營救以脫爲快輸京物料之出松者如蒟黃羅諸色貲重病民先生懇于京尹樊公瑩得

請減免至今松民被其惠焉郡嘗大侵疫疠交作本
府陳公威就先生問計先生請出在廬焚銀以散給
飢民又請以聖子方飲諸病者所活之人無慮數萬
先生又自禱於長春蓬萊二院終日百拜祝天無降
災于民蓋其憂世之心拳拳如此使得效用于時盡
展厥蘊則其所樹立豈出古名卿才大夫下邪然有
才無命齎志以歿此予所以悲之而不能已也先生
之塋為戊子月日其墓在盤龍塘附先兆銘曰
物之顯晦實繫于逢闢尊得志愈于豪雄驥弗驂乘
徒美駑庸吁嗟先生吾憫其窮為述厥美藏之幽宮

亡女江婦墓誌銘

吾女卒之明年八月其夫邑庠生江以郊于吉請於其父憲副石峯公及母孀孺人將塋之唐源山麓以誌銘請吾悲來自勝尚恩銘吾女哉然度吾女有知弗得銘無以自慰乃收淚敘而銘之蓋吾爲禮部侍郎之明年爲正德歲辰辰娶故冢宰謚清簡德興孫公之女爲繼室明年己巳五月十五日而吾女生於時武宗皇帝推恩賜誥封孫氏爲淑人故吾女以淑恩名幼警慧習纂組輶工又好爲烹飪酒漿之事吾及其母愛之爲慎擇所歸卒己之夏公

伯于呂梁之許。宣爾而予之德。君蓋不能忘。
未有以許也。嘉靖甲申石岑八。其族子少師成懋。
穀及吾從弟庶子子和爲于吉媒。吾念江費世睦。又
聞于吉有異質。乃許之。其秋石岑公自蜀使人納幣。
乙酉之冬于吉來迎婦。丙戌三月乃以吾女歸之。踰
年爲丁亥。吾釋位南歸。時吾女方有娠。勉遵途舟。
車撼顛勞苦萬狀。吾心憂懸懸。至五月抵郡。寓于官
舍。生一女。幸而無恙。然在蓐病甚。旬七決乃克歸江。
氏謁舅姑行醴饋禮。自是體猶未健。吾女懼傷父母
之心。不輕以聞。成子之復病齒病。瘍血氣日虛。至冬

而痰喘作矣吾遣其兄繼賢往視知病已革乃自往
視之見吾女羸甚知不可爲然其神尚爽間語及兩
家諸務詳而不亂石峯公設酒樂作于堂吾懼其病
喧而止之吾女謂吾舅燕客必作樂以爲常慎勿以
吾病而妨其樂也盖自吾至之三日喘若少寧石峯
公與吾皆竊喜庶幾無事不數日喘復大作遂不起
盖季冬之朔日也嗚呼吾女歸江氏僅三年年二十
而卒天於吾女胡奪之如是其速耶吾女雖生長富
貴服飾簡素不務華靡處閨中宴坐終日足不踰閭
閻頓置有常所不貴也遷其靜寡儉朴盖天性然

秋四十有七娶高氏繼室以田氏劉氏蔡氏俱無子
女一人田出也適李鉞其塋以卒之明年五月二日
墓在順義之龍山村實祔先塋君性至孝父嘗被誣
坐太辟君曰吾男子也顧不若緹縈一女子何以生
爲訴于官願代死言直者憫之事乃白得從末減父
尋卒毀幾滅性苦塊更三年不內處每遇忌哀如初
喪母性嚴君終身奉教惟謹叔鑑及嬭李老而貧君
事之如父母旣沒撫其子女無異同胞其待交游也
厚所嘗受業師魏志剛死而無嗣歲時必爲位祭之
其平居言動不苟矜嚴好禮學必以古人自勵未第

時見時事可憂輒輦蹇蹇竟日嘗曰范文正做秀才便
以天下爲己任吾人可諉之分外耶故君之居官雖
未甚久而其風節卓卓如此是於銘固宜銘曰發之
也遲官僅一遷其年弗永其世弗延命實爲之歸咎
于天我生我食忍弗死報爲臣則忠爲子則孝茲惟
不朽長短奚校龍山之村有封巋然女弟之子求銘
以鐫弗愧予辭百世其傳